


ჟურნალ „ქართული წყაროთმცოდნეობის“ XXI ტომის პრეზენტაცია

სოფიო ქადაგიშვილი
მარიამ ჩხარტიშვილი

2020 წლის 21 თებერვალს ივანე ჯავახიშვილის სახელობის თბილისის სახელმწიფო უნივერსიტეტში გაიმართა ჟურნალ „ქართული წყაროთმცოდნეობის“ XXI ტომის პრეზენტაცია. ტრადიციად არა მხოლოდ ჟურნალის პრეზენტაცია იქცა, არამედ ყველა თაობის მეცნიერთა შეკრება, უკვე ჩამოყალიბებული წრისა, რომელიც ჟურნალის გარშემო ერთიანდება. ცხადია, ეს არ არის მხოლოდ ფორმალური შეხვედრები, ეს ის კავშირია, რომელიც ჟურნალის იდეას წარმოადგენს: თავი მოუყაროს პროფესიონალთა და შესაბამისი დარგით დაინტერესებული საზოგადოების წარმომადგენელთა სხვადასხვა თაობას ერთად.



ჟურნალის დიდი ხნის ისტორიაზე და მის მნიშვნელობაზე არა ერთხელ თქმულა დაწერილა, ამიტომ ამჯერად ამის შესახებ სიტყვას არ გავაგრძელებთ. შეიძლება გადაუჭარბებლად ითქვას, რომ ჩვენს რეალობაში „ქართული წყაროთმცოდნეობა“ გამოხატავს თანამედროვე ქართული ისტორიული მეცნიერების მაჟისცემას. ამას მისი რუბრიკების მრავალფეროვნებაც მოწმობს. სამეცნიერო სტატიების გარდა, აქ შეხვდებით რეცენზიებს, პრეზენტაციების თუ კონფერენციების მიმოხილვებს, მილოცვებს, პოლემიკას, თვალსაზრისს. ეს უკანასკნელი არის რუბრიკა, რომელიც სამეცნიერო ეთიკის საკითხებს ეხება. რუბრიკა „მოგონება“ გვახსენებს და პატივს მიაგებს გარდაცვლილ მეცნიერთა ღვაწლს, ისტორიას უნახავს პიროვნული ურთიერთობის იმგვარ დეტალებს, რომელსაც სხვა რუბრიკაში წარმოდგენილ ისტორიოგრაფიულ მიმოხილვაში, ცხადია, ვერ შეხვდებით.

ჟურნალის აღნიშნული ტომის მომზადებაში დიდი წვლილი მიუძღვით თავად ავტორებს, რედაქციის წევრებს და თსუ ივანე ჯავახიშვილის სახელობის ისტორიისა და ეთნოლოგიის ინსტიტუტის ხელმძღვანელობას.

სხდომა გახსნა ივანე ჯავახიშვილის სახელობის ისტორიისა და ეთნოლოგიის დირექტორმა გიორგი ჭეიშვილმა. მან მოკლედ ისაუბრა ზოგადად ქართული ისტორიული მეცნიერების განვითარების ისტორიის და თანამედროვე მდგომარეობის შესახებ და მიუთითა იმ გამოწვევების თაობაზე, რომელსაც ახლანდელი ვითარება აყენებს ინსტიტუტის, როგორც საქართველოში ისტორიის დარგში ერთ-ერთი უმთავრესი კვლევითი ცენტრის, წინაშე. მან კმაყოფილებით აღნიშნა ის ფაქტი, რომ მიუხედავად რთული ვითარებისა, ინსტიტუტში პერიოდული გამოცემების ბეჭდვა არ შეწყვეტილა და ამაში უდიდესია ცალკეულ პიროვნებათა დამსახურება, რომელნიც ენთუზიაზმით მუშაობენ. პირველ რიგში, ეს ითქმის ჟურნალ „ქართული წყაროთმცოდნეობის“ რედკოლეგიის შესახებ. რომელმაც, როგორც წინა წლებში, ახლაც შესანიშნავი ნომერი შესთავაზა სამეცნიერო საზოგადოებას.



გ. ჭეიშვილმა სიტყვა გადასცა ჟურნალის რედაქტორს პროფესორ მარიამ ჩხარტიშვილს. მ. ჩხარტიშვილმა მოკლედ დაახასიათა ჟურნალის ახალი ტომი, მადლიერება გამოხატა ინსტიტუტის ხელმძღვანელობისადმი მხარდაჭერისათვის, მადლობა გადაუხადა ავტორებს თანამშრომლობისათვის, დამსწრე საზოგადოებას გამოჩენილი ინტერესისათვის, ჟურნალის გულშემატკივრობისათვის. ყველაზე თავდადებულ გულშემატკივრად მის მიერ მიჩნეულ იქნა პატარა იოანე გუნცაძე, რომელიც ისტორიკოსთა ოჯახიდან წარმომავლობს. მიუხედავად იმისა, რომ იოანე სულ ორი წლისაა, უკვე მეორედ ესწრება ჟურნალის პრეზენტაციას.



სიტყვები წარმოთქვამს ვალერი ვაშაკიძემ, ვახტანგ გოილაძემ, მამუკა წურწუმიამ, ლადო მირიანაშვილმა, სოფიო ქადგიშვილმა.



მარიამ ჩხარტიშვილმა დამსწრეებს გააცნო რედკოლეგიის ახალი ინიციატივა: გამოვლინდეს ჟურნალის ყველაზე ერთგული ავტორი. ასეთად რედკოლეგიამ მიიჩნია ლადო მირიანაშვილი. აღინიშნა, რომ ბატონ ლადოს ჟურნალთან მრავალწლიანი თანამშრომლობა აკავშირებს. მისი საინტერესო, მაღალ პროფესიულ დონეზე შესრულებული ნაშრომები ძალიან ამდიდრებს ჟურნალს. კონკრეტულად XXI ტომში მან გამოაქვეყნა ყველაზე მეტი სტატია, როგორც კვლევითი ხასიათისა, ასევე რეცენზია თუ ინფორმაცია. ამით დიდად შეუწყო ხელი საქართველოში მიმდინარე სამეცნიერო ცხოვრების სათანადოდ წარმოჩენას ჟურნალის ფურცლებზე. ლ. მირიანაშვილს გადაეცა საჩუქრები სამახოვრო წარწერებით.



ჟურნალის ახალი ნომრის პრეზენტაციის ოფიციალური ნაწილი ამით დასრულდა. თუმცა შეკრებილი საზოგადოება არ დაშლილა, საინტერესო დისკუსიები და აზრთა გაცვლა-გამოცვლა გაგრძელდა ამ ჟურნალისათვის უკვე ტრადიციად ქცეული ფურშეთით, რომელიც ხელს უწყობს კოლეგების დაახლოებას და იდეების გაზიარებას.

2020 წლის დასაწყისში „ქართული წყაროთმცოდნეობის“ XXI ნომრის პრეზენტაცია აღმოჩნდა ერთ-ერთი მნიშვნელოვანი ბოლო სამეცნიერო შეხვედრა რეალურ სივრცეში ახალი მსოფლიო ვირუსის მომძლავრების ჟამს. მიუხედავად საზოგადოებაში არსებული სტრესული განწყობებისა, მოხარულნი ვართ, რომ გვაქვს შესაძლებლობა, ჟურნალის 21-ე ნომრის პრეზენტაციიდან ერთი წლის შემდეგ ახალი ტომი წარმოვუდგინოთ ქართულ საზოგადოებას.



ვიმედოვნებთ, რომ ჟურნალი „ქართული წყაროთმცოდნეობა“ კვლავაც დარჩება მნიშვნელოვან სამეცნიერო მედიად საქართველოს ისტორიით და სხვა მომიჯნავე დარგებით დაინტერესებული მკვლევრებისათვის.



PRESENTATION OF THE SCHOLARLY JOURNAL “GEORGIAN SOURCE-STUDIES” (VOLUME 21)

Sopio Kadagishvili
Mariam Chkhartishvili

It is already tradition to host a presentation of a new volume of the scholarly journal at Ivane Javakhishvili Tbilisi State University. Despite significant challenges that provoke 2020 it made possible to produce one of the interesting and impressive volumes of “Georgian Source-Studies”. The Journal shares various of interesting sections: scientific papers, chronicles, book reviews, comments, memoriam etc.

The volume was published with the support of TSU Ivane Javakhishvili Institute of History and Ethnology. Presentation day gathered dozens of specialists, young researchers and students together. The event was opened by the director of The Institute of History and Ethnology George Tcheishvili. The issue was presented by the editor of the journal Mariam Chkhartishvili. Speeches were given by Valeri Vashskidze, Vakhtang Goiladze, Mamka Tsurtsunia, Lado Mirianashvili, Sopio Kadagishvili. Compliments and congrats were expressed by invited guests. The official part of the presentation finished with reward to the one of the authors Lado Mirianashvili for his long-term and fruitful collaboration with the journal.

The presentation ended with nice buffet that always makes favorable situation for cooperation of the colleagues and atmosphere to share new ideas among them.